

www.BibleForChildren.org

Génesis 3



Chaypitarämi runaga warminpa
jutinta churaparan «Eva» nir.
Chayno jutita churaparan pay
gueshyacushallanpita llapan runacuna
ollgupis warmipis mirananpaj captinmi.



Tayta Dios camashan llapan
animalcunapita culebraga caran mas
sabidu. Chaymi warmi caycashan
cajman aywaycur tapuran:
«¿Rasunpachi Dios nisha-cashunqui
maygan yörapa wayuynintapis mana
micunayquicunapaj?»»




Chayno niptin
warmi niran:
«Yöracunapa
wayuynintaga
micunäcunapämi nimasha. Wertapa
chaupincho caycaj yörapa wayuyninpämi ichanga
nogacunata Tayta Dios nimasha mana
micunäcunapaj, ni
yatayllapis mana
yatanäcunapaj. Chay
yörapa wayuyninta micorga
wañushäcunashi.»



Chayno niptin
culebraga warmita
niran:

«Nishushayquega
manami rasunpachu. Manami wañunquipächu.
Diosga musyanmi chay yörapa wayuyninta
micushpayqui Diosnöna alli cajtapis
mana alli cajtapis
musyanayquipaj
cashanta.»




Chay yörapa wayuynin munapaypaj
caycajta ricar warmi fiyupa munaparan.
Yachaj tantiyaj cayta munashpan
yörapa wayuyninta pallarcu micuran.
Nircu runantapis macyaran paypis
micunanpaj. Chaura runanpis
micuran.



Chay frütata micurcärergerga jinan öra
tantiyacuran galalla carcaycashanta.
Chaura igus yörapa öjanta jirarcurna
pengayninta chapacuran.





Runata Tayta

Dios gayacuran: «¿Maychötaj

caycanqui?» nir. Chaura runa niran:

«Wertacho puriycashayquita mayarmi

manchacushpä pacacushcä galalla cashpä, tayta.»





Chaura Dios

tapuran: «¿Pitaj

nisha-cashunqui galalla cashayquita?

¿«Ama micunquichu» nishä yörapa

wayuynintachu micushcanqui?»




Niptin runa niran: «Majäpaj apapämashayqui
warmi macyamaptinmi micushcä, tayta.»
Chaura warmitana Tayta Diosga tapuran:
«¿Imatataj rurashcanqui?» nir. Warmina
niran: «Culebra engañamaptinmi
micushcä.»





Chayno nirmi runataga Edén wertapita garguran. Nircur chacramanna arunanpaj churaran, allpapita rurasha cashanman.



Runata chayno
gargurir Tayta Diosga wertaman
churaran querubín nishan anjilcunata.
Paycunaga achicyaypa achicyar
rataycaj sablinwan caycaran. Chay
wertata täpaycaran inti
yagamunan caj-lächo,
imaycamapis
cawachicoj
yöraman mana pipis yaycunanpaj.



Chaypita Adanga warmin Evawan puñuran. Chaura
Evaga gueshyaj ricacuran. Gueshyacushpan Eva niran:
«Tayta Dios munayninpa ollgu wamrata tarishcä.
Chaynöpami cay wamräpa jutin canga Caín.»




Chaypita yapay ollgu wamran caran. Chay caj
wamranpa jutintanami churaparan «Abel» nir.
Abelga jatunyar uyshayoj cabrayoj caran.
Cainnami chacra aroj caran.




Achca watataraj Cainga Tayta Diospaj aparán micuynin wayushanta. Chayno Abelpis Tayta Diospaj aparán manta uyshacunapa rimir caj wawancunata mas wirannin cajta. Chaymi Abel apashan cajtaga Tayta Dios alli chasquiran. Caín apashanta ichanga mana chasquiranchu Abelpatanöga. Chaura Cainga fiyupa rabyar jucajyasha


puriran.



Juc junajcho wauguin Abelta Cainga «Jircapa pasyaj aywashun» niran. Jircacho ishcallan caycarna illajpita Abelta wañuycachiran.



Chaypita Tayta Diosga Cainta tapuran: «¿Maytaj wauguiqui Abel?» nir. Tapuptin Caín niran: «Nogaga manami musyächu. ¿Wauguë ricaj-imatächu cá?» Chaynömi Cainga Tayta Dioswan parlaycashanpita aywacuran «Nod» nishan partiman. Chayga caycaran Edenman inti yagamunan caj-lächo.



Adanga warminwan yapay cacuran. Warmin yapay gueshyaj ricacur gueshyacuran ollgu wamrata. Nircur niran: «Abelpa ruquin cananpämi Dios munasha wamrayoj canäta. Chaymi wamräpa jutinta churapëshaj «Set» nir, Abelta Caín wañuchishanpa ruquin captin.»



Wamran yurishanpita pusaj pachac (800) wataraj
Adanga cawaran. Chay wamranpa jananman warmi
ollgu wamrancuna caranraj. Chaura Adanga
cawaran isgun pachac quimsa chunca (930)
watayoj cananyaj. Chay watayoj
caycar-raj wañuran.



Tayta Dios ricaran runacuna pasaypa mana alli rurayllachöna cawashanta. Chay runacunaga yarparaycaran jucha rurayllapaj. Chaymi Tayta Diosga runata rurashanpita pësacushpan niran: «¡Imapäräj runata rurarä!»



«Cananga rurashä runacunata ushajpaj
illgächishaj. Illgächishaj llapan
animalcunata garachaypa
purejcunatawan päriypa
purejcunatapis.»



Noëtami ichanga Tayta Dios alli ñawinpa ricaran
pay munashanno cawaptin. Noëpaga
wamrancuna caran quimsa. Jutincuna
caran: Sem, Cam, Jafet.



Tayta Diosga runacunata fiyupa
cuyarmi japallan cuyay wamranta
cachamuran Payman pipis yäracoj
cäga mana wañunanpaj chaypa
ruquenga imaycamapis
cawananpaj.



Romanos 3:23 Llapan runami juchayojlla caycan.
Chaynöpami salbacoj Tayta Diosninchipa ñaupanpitapis
carucho caycanchi.

Romanos 6:23 Jucha rurayllacho cawajcunapa pägonga
wañuymi. Tayta Dios gomashanchimi ichanga Tayta
Jesucristuwan imaycamapis cawananchipaj caycan.

Hebreos 9:27 Chayno juc cutillami pi-maypis wañun.
Chaypitaga cawarimonga imano goyashanpitapis jugasha
canallanpänam.

Efesios 2:8,9 Tayta Diosninchichi cuyapäcoj carmi
Jesucristuman yäracuptiqui salbashurayqui. Manami
imatapis rurashcanquichu salbasha canayquipaj. Chaypa
ruquenga quiquin Tayta Diosninchichi munarmi
salbashurayqui. Manami allicunata rurashayquipitachu
salbashurayqui. Chaymi pipis mana alli-tucongachu
«caytami wactami rurashcä» nir.



Romanos 10:9,10 Chaura Jesucristo Taytayqui cashanta willacorga y wañushanpita Tayta Diosninchi cawarachimushanta rasunpa riguerga salbashami canquipaj. Jesucristuta cawarachimushanta riguiptinchëga Tayta Diosninchi allimi ricamëshun. Jesucristo Taytanchi cashanta niptinchëga salbashami cashunpaj.

Juan 3:16,17 «Tayta Diosga runacunata fiyupa cuyarmi japallan cuyay wamranta cachamuran Payman pipis yäraoj cäga mana wañunanpaj chaypa ruquenga imaycamapis cawananpaj. Diosninchëga cay pachaman wamranta cachamusha payman yäraojcunata salbananpämi, manami castigasha cananpächu.»



1 Juan 5:11-13 Tayta Diosga willachimashcanchi Wamran Jesucristuman riguir mana ushacaj cawayta tarinanchipaj cashantami. Chay cawayga Wamrallanchömi caycan. Tayta Diospa Wamranman yäraojcunaga mana ushacaj cawaytami tarin. Mana yäraoj cajmi ichanga chay cawayta mana tarengachu. Gamcunamanga cartata apaycächimö Tayta Diospa Wamranman riguishayquipita mana ushacaj cawayta tarishayquita musyanayquipämi.



Génesis 3 – 6

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: M. Maillot; Tammy S.

Quechua, Huallaga Huánuco Bible (qub) © 2010, Wycliffe
Bible Translators, Inc. All rights reserved. In cooperation with
Asociación Cristiana JAWCA.

<https://www.bible.com/bible/1088/MAT.1>

©2025 Bible for Children, Inc.

www.M1914.org

www.bibleforchildren.org

